

Zava-doza ataon'ny fitondrana Rajoelina 3
Tsy takona afenina ny fanodinkodinana saim-bahoaka ataony

Ny Valosoa sy Fakafaka 2
Maro ireo mizana tsindrin'ila ataon'ny mpitondra eto

NY VALOSOA

Gazety miseho intelo isan-kerinandro (Talata - Alakamisy - Sabotsy) VAOVAO

Hetsiky Ny Mpitondra Fivavahana (HMF) 2

Mamono hasina ny manolo zavatra hafa ny efa noreketin'ny tantara fa hazo

www.gvalosoa.com

gvalosoa@yahoo.com

facebook : gazety valosoa rakoto

Sabotsy 1 oktobra 2022

Laharana 1351

Vidiny : 600 Ar

Filoha Rajoelina

2

Nandainga tamin'ireo mpanao lalana tsy nahazo ny volany



Fifidianana

2

Tsy azo antoka ny rindram-baiko na logiciel ny CENI



Petite Vitesse

3

Tadiavin'i Vazahabe ho tapahana ny sotro fihinanan'ny mpivarotra



Fivorian'ny filankevitry ny tanàna CUA

2

Nivoaka ny trano fivoriana ny mpanolotsaina TIM



Tranga mampalahelo

6

Zazalahy kely 9 taona maty nodarohan-dreniny

Fifamoivoizana

6

Saofera sy resevera mamo am-perinasa, nosamborin'ny zandary

Daka kely



Iza no aripakareo amin'ireny fitaovampiadiana be dia be ireny ry Boaikely a !

FIVORIAN'NY FILANKEVITRY NY TANÀNA CUA

Nivoaka ny trano fivoriana ny mpanolotsaina TIM

Nisy ny fivoriana tsy ara-potoana izay nataon'ny mpanolotsaina ny tanànan'Antananarivo (CUA) omaly 30 septambra, tao amin'ny lapan'ny tanàna Analakely. Isan'ny lahadinika natao tamin'izany ny mikasika ny resaka taxi- moto, izay efa nolavin'ny mpanolotsaina maro an'isa nefa mbola tadiavina atao letrezana ihany ny fandaniana izany, eo anivon'ny filankevitry ny CUA. Manoloana izany dia nanapakevitra ny mpanolotsaina lany tamin'ny antoko Tiako i Madagasikara (TIM) fa hivoaka ny efitrano fivoriana, ka tsy handray anjara amin'ny fifidianana amboletra tian'ny ben'ny tanàna Naina Andriatsitohaina atao. Nanambara ireo mpanolotsaina TIM, fa fanivaivana ny hasin'ny mpanolotsaina ny famerenana an-tery ireo lahadinika efa nolavina tao anatin'ny fanapahan-kevitra (deliberation) natao ny 26 aogositra 2021. Efa nentina taminay hoy izy ireo ny resaka taxi-moto ary efa nolavina ihany koa ny 30 aogositra 2022, naverina nodiniana fa mbola nolavinay hatrany. Fanitsakitsahana ny zonay nanapakevitra ny mbola fanaovana amboletra hamerina an'io indray, hoy ireo mpanolotsaina TIM, ary tsy io ihany fa maromaro ireo lahadinika nanaovana izany. Araka izany dia tompon'antoka tanteraka amin'izao fanapahan-kevitra izao ary mpiray tsikombakomba amin'ny fanaovana tsinontsinona ny zon'ny mpanolotsaina, ireo rehetra mbola manaiky na iza izy na iza, ny hamerenana izao fifidianana izao indray. No-lazaina fa fahasahiranana amin'ny fomba hampi-haran'ny mpanatanteraka ny lalàna noho ny resaka vide



juridique, no antony namerenana indray ny lahadinika. Raha ny tsy fisian'ny lalàna no olana, afaka mamolavola tolo-dalàna ho amin'izany ny vaomieran'ny fitaterana dia voavaha ilay lazaina fa olana, fa tsy ny fanapahan-kevitra efa noraisina no atao remise en cause. Noho izany, ho angatahinay Mpanolotsaina TIM, sy ireo miaraka aminay eny amin'ny tribunal administratif ny tsy hampanankery ary hanafoanana tanteraka izay fanapahan-kevitra rehetra naverina izany, noho ireo antony efa voalazanay tetsy ambony ireo, hoy ny fanambarana. Tantara mitohy arak'izany ity resaka fanaovana amboletra ataon'i Vazahabe sy ny ekipany ity.

Helisoa

Fifidianana

Tsy azo antoka ny rindram-baiko na logiciel ny CENI

Tsy azo antoka ny rindram-baiko na logiciel hampiasain'ny CENI, na ny vaomieram-pirenena mahaleotena misahana ny fifidianana eto amintsika. Efa nentina teto ihany ny filazana nataon'ny Ceni momba ny fanatsarana ny fomba fiasa sy ny fanavaozana ny fitaovana entina manatant-raka ny fifidianana amin'ny ankapobeny. Ny logiciel kosa anefa hoy ireo mpanao politika nanaraka ny fihonana teny Alarobia ny alakamisy teo, dia nanambara fa tokony hanaovana fitsirihana manokana na audit eo anatrehan'ny Vondrona Eoropeana, satria tsy azo antoka mihitsy, efa antitra ary efa nahitana lesoka nanomboka tamin'ny taona 2005 no mankaty izany rindram-baiko hampiasain'ny CENI izany. Nahita sy nahatsapa izany avokoa ireo solonte-



Ny sekretera jeneraly nasionalin'ny antoko TIM, Riana Randriamasinoro.

nan'antoko politika tonga teny, ka tsy diso anjara nilaza izany "audit" izany, toa an'Andriamatoa isany Roland Ratsiraka, MTS, sy ny sekretera jeneralin'ny antoko TIM Riana Randriamasinoro, izay nanamafy fa toy ny fiara 2Cv lany andro efa simba, no mbola antsoantsoina hoe mety sy mahaso, ary lazain'ny filohan'ny Ceni, fa efa voasedra amin'ny tokony ho izy.

Marihina fa ireo olona 5000 hirotsaka amin'ny fanavaozana ny lisitry ny mpifidy mihitsy, no efa atidoha logiciel hafa kely hanimba ny toe-draharaha hoy ireo mpanara-bao-vao, satria na dia tatitra marina aza miainga eo amin'ny biraom-pifidianana iray, dia tsy ilaozan'ny maramara saina hanova vokatra mandrapahatonga eny amin'ny birao foibe mpanisa vato,

ka mety ho lasa vokatra hafahafa indray. Ny atidoha logiciel lazaina fa manara-penitra, no efa olana eto hoy ny rehetra, manao asa maizina. Mazava araka izany fa tokony hisy ny fifanatonana mialoha na fikaonandoham-pirenena, mba hisorohana ny tsy rariny mety hitranga, ka hanimba tanteraka ity firenena efa very laharana ity indray, handalinana misimisy ny lalam-pifidianana efa lany andro. Raha olo-marina Rajoelina sy ny ekipany hoy ny maro, dia tokony hanaiky izany mba hanatsarana sy hanitsiana ny lalam-diso hatramin'izay. Soritina fa ireo voafonja vonjimaika MD, sy ireo mbola tsy mahazo didy raikitra dia tsy diso anjara amin'izao fanisana sy fifidianana hatao izao ihany koa.

Beharo

Hetsiky Ny Mpitondra Fivavahana (HMF)

Mamono hasina ny manolo zavatra hafa ny efa noreketin'ny tantara fa hazo

Naneho hevitra mahakasika ny zava-misy eto amin'ny firenena amin'izao fotoana indray ny HMF, na ny Hetsiky ny Mpitondra Fivavahana. "Ny resaka hasina dia tsy voatery ho resaka finoana sy fivavahana fa "fiavahana" sy "fisongadinana", noho ny fahadiovany na noho ny tantarany mivavaka. Ny atao hoe "hasina" hoy ny Raiaman-dreny Ramambaso Joseph dia "tsy azo idirana", "tsy azo lotoina" (Mpaminany sy Firenena, Hevi-



Ireo anisan'ny mpitarika ny Hetsiky ny Mpitondra Fivavahana.

teny Obadia, Malakia, Joseph, Ed. Antso, 1996). Mamono hasina izay mampifangaro izay tsy azo

afangaro, manolo zavatra hafa izay efa noreketin'ny tantara fa hazo. Rehefa maty hasina ny zavatra

"niavaka"(masina) iray dia very ny mampiavaka azy ary voakosoka ny tantarany, ka tsy hasian'ny olona maso akory. Isika Kristianina dia tokony hahay manavaka ny masina sy ny tsy masina, sady hanaja ny hasina maha olon'Andriamanitra antsika, « satria voasoratra hoe: "Ho masina ianao, satria masina Aho" (Lev. 11.44). » (1 Petera 1,16). Samy hieritreritra sy handini-tena isika!" hoy ny fanambarana.

Nangonin'i Niaina

Ny Valosoa sy fakafaka

Maro ireo mizana tsindrin'ila ataon'ny mpitondra eto

Misy ny mizana tsindrian'ila ataon'ny tompon'ny fahafana eto amin'ny firenena amin'ny lafiny maro, izay iainana ankehitriny. Fa ny resaka fitsarana dia efa mampiteny ny moana, satria hita mibaribary izany raha tsy hijery afa-tsy ireo tranga izay niseho tato ho ato. Mipetraka eto ny fanontaniana hoe natao ho an'iza marina ny lalàna eto Madagasikara? Ny fitorian'ny mpanohitra mikasika ireo fanalam-bakaka ataon'ny mpomba ny fitondrana teny amin'ny sampan-draharaha momba ny heloka an'habaka (cybecriminalite), izay voatokana ho amin'izany, tsy misy tohiny hatramin'izao. Mailaka mihitsy anefa ny mpitondra filaminana raha vao ny mpitondra no mameraka fitoriana. Izany no mahazo an'i Stan'ley Ramarivelo izay efa ho herinandro no notazonina teny amin'ny Toby Ratsimandrava. Omaly vao niakatra fitsarana, mbola tsy hay izay hahazo azy hatramin'izao ora anoratana izao. Etsy ankilany, nomena fahafahana vonjy maika ireo karana miisa 4 nigadra teny Tsiarahy, kanefa dia nohasarotina aoka izany ny fahazoan'ila administratera sivily Andrianjafinaivo Lahinirina Edward, prefet an'i Toliara teo aloha, tokony hanao "dialyse" ka maty tao am-ponja. Ny tale jeneralin'ny CNAPS voasaringotra, fa nandinkodina ny volan'ny mpiasa amina miliara maro, nampandositra nivoaka ny fonja. Ninie Donia niaro ireo vahoaka madinika indray, nampangaina ho fikambanan-jiolahy dia nogadraina enimbolana antranomaizina. Ankoatra izay, afaka manangona olona ny antoko TGV amin'ny toerana izay tiary hanaovana izany, fa hoe hanao famelomamaso ny antoko izy ireo. Bahanany ny lalana andehana, tsy misy izany hoe manakana ny fandehanan'ny olona sy ny fiara fitaterana. Ny antoko hafa, indrindra ny Tiako i Madagasikara (TIM) dia sakanana amin'izay toerana hivorianana, na ao amin'ny toerana mifefy misy tompony aza. Ny filoha Marc Ravalomanana sakanana amin'ny toerana izay alehany. Dia toy izany no zavatra misy eto amin'ny firenena. Mihevitra ve ny mpitondra ankehitriny fa ho eo amin'ny fahafana mandrakizay? ny fanaporetana olona amin'izao ve ahatonga ny fitondrana ho mamim-bahoaka? Tsy maintsy ho tonga ny fetran'izany rehetra izany, na ho ela na ho haingana!

Helisoa

Filoha Rajoelina

Nandainga tamin'ireo mpanao lalana tsy nahazo ny volany

Nandainga tamin'ireo orinasa mpikojakoja lalana tsy nahazo ny volany hatramin'izao ny filoha Rajoelina. Nijoro ho vavolombelona nilaza ampahibemaso ny lainga sy ny fampanantenana poak'aty fanaon'i Andry Rajoelina ireo tompona orinasa mpanao lalana tsy mbola nahazo ny volany efa ho 3 taona latsaka kely ireo tamin'ity herinandro ity. Noraisin'ny filoha Andry Rajoelina izy ny faha-2 Aogositra lasa teo teny Ambohitsorohitra. Nambaran'i Andry Rajoelina tamin'izany, fa "tsy fombako izany mamotika orinasa Malagasy izany, ka ho aloako ao anatin'ny 3 andro ny volanareo". Tehaka mirefodrefotra hoy ireto tompona orinasa ireto no nataon'izy ireo, saingy indrisy, efa faha-29 Septambra isika izao, tsy nisy na ariary aza nefaina taminay. Nambaran'ireto tompona orinasa mpanao lalana irero, fa 5 andro tamin'ny andron'ny filoha Marc Ravalomanana dia efa voalao ny volan'izy ireo; 15 andro kosa tamin'i Hery Rajaonarimampianina dia no nanefana ny volan'ny orinasa. Tsy mbola nisy tahaka izao hatramin'izay fitondrana nifandimby hoy hatrany ireo mpandraharaha mpanao lalana ireo.

Stefa



Ny Valosoa sy hadihady

Zava-doza ataon'ny fitondrana Rajoelina

Tsy takona afenina ny fanodinkodinana saim-bahoaka ataony

Tsy takona hafeninana intsony ny fanodinkodinana ny saim-bahoaka amin'ny fomba rehetra, entina hanafenana ny zava-doza ataon'ny fitondrana. Ankoatry ny rediredy nampidina ambany dia ambany ny fiandrianan'ny Firenena, tany amin'ny Fivoriamban'ny Firenena Mikambana tany New-York dia mbola manohy ny fieboeboana fa hahavita zavatra goavambe ihany ny filohan'ny Repoblika Rajoelina ato anatin'ny herintaona sisa tavela ijanonany eo amin'ny fitondrana. Tsy nisy nahita tokoa ny nanombohan'izao fitondrana izao ny fanarenana ny Trano Vola ao amin'ny Rovani Manjakamiadana. Tsy misy valaka tamin'ny nanorenan-dRajoelina Andry, tamin'ny alalan'ny Minisiteran'ny Kolontsaina sy Sersera, ny « Colisée ». Nanota fady indray izao fitondrana izao, ka efa nanomboka antsokosoko ny fanorenana ny « Trano Vola » ao anaty Rova. Ny tena manahirana dia tsy tena fitiavana ny hamelomaso ny vakoka sy ny soatoavina malagasy ny an'ny minisitry ny Sersera, fa te-hametraka ny dian-tànany fa nahavita zavatra teto amin'ny Firenena izy, ka ho fantatry ny « zanakamaparany » ny anarany. Antananarivo anefa tsy Madagasikara, ka nahoana no tsy sahy mitikita ny « Doany » na « Tranobe » any amin'ny Faritra izao fitondrana izao. Azo inoana mantsy, fa fantatr'izao fitondrana izao, fa hirotsika ny Ampanjaka sy ny mponina raha hanao izany izy. Iaraha-mahita fa hazo avokoa ny akora nentina nanorina ny «Trano Vola» sy ny «Doany» ary ny «Tranobe», ka tsy hanana ny «hasiny» intsony raha soloina «parpaings sy «béton» izany akora izany. Efa manakiana izao ataon'ny fitondrana izao ny taranaky ny Andriana eto Antananarivo ary inoana ihany koa, fa tsy maintsy hanao hetsika hanoherana izao tsy fanajana ny soatoavina izao ireto farany. Tokony ho ao an-tsaina mandrakariva fa matoa ny firenena any ivelany, toa an'i Japon sy Anglatera ohatra, mandroso sy mahasarika mpizahatany ny vakoka any aminy dia tsy mametraka «architecture» vahiny ao anatin'ny toerana mampivavaka azy amin'ny hafa izy. Tsy misy marina tsy atao hiseho tokoa satria dia miara-mipoitra amin'ity raharaha Rovani Manjakamiadana ity ny solika mitapoka solitany fandrehitra, ka ny manahirana dia voasam-

botsambotra sy ampidirina any am-ponja ny olona heverina fa asaina manao ny asa fotsiny kanefa ny atidoha mikotrika sy ny tompontoka dia mitsotsotra any ihany. Raha olona mahalala ny hasin'ny ao amin'ny Rovani Manjakamiadana izany dia tsy ho sahy hikitikita ao mihitsy. Tsy mbola voasambotra ireo mpiasa ireo kanefa loza mitatao ho azy ireo izany. Teny Ivato ny filohan'ny Repoblika ny alarobia lasa teo dia nanambara fa hividy angidimby iray ho an'ny Tafika an'habakabaka, hono. Mihevitra ny filohan'ny Repoblika fa adinon'ny Malagasy fa angidimby folo no nampanantenainy tamin'izany fotoana izany ary entina hiady amin'ny dahalo izany. Soa fa tsy nolazainy tany amin'ny Fivoriamban'ny Firenena Mikambana, fa raha vao tafaverina eto Madagasikara izy dia hividy angidimby toa ny fanamboarana ny lalambe migodana hatomboka afaka volana vitsivitsy. Nivoaka ihany koa ny fampidirana mpiasam-panjakana marobe tsy azo eritreretina kanefa asa raha ho tafiditra amin'ny sorabola ao amin'ny lalàn'ny fitatantanambola lasitra 2023 izany ary misy toerana banga (postes budgétaires) mifanaraka amin'izany ve? Ny manahirana dia misy amin'ny mpiasam-panjakana amperin'asan'ny departemanta sasany aza tsy voaloka ny karamany, ka fampanantenana entina isarihana ny sain'ny tanora indray izany, mba hifidy an-dRajoelina Andry amin'ny fidiavana 2023. Asa koa raha ho voafehin'ny fitondrana ny fanodinkodinam-bolam-bahoaka izay heverina fa be lavitra noho izay navoakan'ny IGE tamin'ny fomba ofisialy ho dimapolo miliara ariary mahery. Homena tombony manokana hono ny sehatry ny fampianarana noho ny rediredy tany amin'ny Fivoriamban'ny Firenena Mikambana, ka tiana harenina sy hitadiavana toeram-boninahitra ho tompondaka indray ny filohan'ny Repoblika. Maro ireo tranga sy hetsika ataon'ny fitondrana izay manamarina, fa tadiaviny havily tsy hieritritra ny loza mianjady aminy ny vahoaka Malagasy tsy vakivolo, ka hampiesonina amin'ny fampianantenana poakaty toy ny fanaony. Ka na inona na inona fahaizana manetsa dia tsarovy mandrakariva fa hafa ny anio sy ny omaly.

Andry Tsiavalona

Transparency International Madagasikara Mitaky ny fandanianana ny lalàna fahazoan'ny daholobe misitraka vaovao

Toy ny firenena maro eran-tany, nankalaza ny andro iraisam-pirenena ho an'ny fahafahan'ny daholobe misitraka vaovao isika eto Madagasikara. Ho fankalazana izay andro iraisampirenena ho an'ny fahafahan'ny daholobe misitraka vaovao izay teo tamin'ny alakamisy 29 septambra teo dia nanao hetsika ny Transparency International - Initiative Madagascar, sy ireo mpiantsehatra miaraka aminy, tamin'ny alalan'ny fanaovana diabe nilamina nanomboka teny Analakely ka hatrany Antaninarenina. Izany dia mba ho fitakiana koa ny fandanianana ny lalàna momba ny fahazoan'ny daholobe misitraka vaovao mahakasika ny fitantanandraharam-panjakana, sy ny lalàna mikasika ny mpiaro ny zon'olombelona, sy ny mpisintonana lakolosy izay mifampiankina. Tamin'ny alalan'ny diabe nilamina izay notanterahana afak'omaly dia mitaky ny fiarahamonimpirenena, mba handinihana sy handanianana ireo lalàna ireo mandritran'ny fotoampivoriana ny Antanimiera roa tonta, amin'ny vola oktobra ho avy izao izy ireo. Ireo lalàna ireo dia singa fototra hahafana mampandroso ny ady amin'ny kolikoly eto Madagasikara.

Isambilo



Ny diabe am-pilaminana nokarakarin'ny Transparency International Initiative Madagasikara.

TONOTRAKALO

Ny mpitondra sy ny fikaonandoham-pirenena

Fikaonandoham-pirenena, izany indray izao no malaza, Saingy ny mpitondra, hatreto, mody mifanahin-jaza. Ahodinkodiny ny saina ho amin-java-tsisy fotony. (Mihevitra izy fa tsy ho sarona irony tetika malotony !)

Tsy azo afenina mihitsy f'izy aloha dia lava tanana, Ka tsabahiny daholo raha vao resa-pifidianana. Efa olona nomaniny ireo hiandraikitra an'izany : Ny avo, ny mpikarakara, hatramin'ny sefom-pokontany!

Raha vao hoe fikaonan-doha no tanisaina na tenenina, Tena mihovitrovitra izy sao ho vaky ny nafenina, Ka averiny ireo fomba nampiasainy tany aloha, Fa tanjony ny hampandamoka ity ilay hoe fikaonandoha!

Fikaonandoham-pirenena, izany indray izao no mahoraka. Ny mpitondra anefa, indrisy, vao mandre dia efa mivoraka! Toa tsy zakany mihitsy izany handia lala-mazava, Noho ilay toetrany efa zatra ny manimba sy mandrava !

...Aoka izay ny famitahana sy ny karazana hafetsena. Ataovy ny fikaonandoha ho fanarenam-pirenena. Raha handà indray ny mpitondra f'efa izany no talentany, Tsara ho azy dieny izao raha toa aharony ny entany !

DADAN'i RIANA (Sept 2022)

PETITE VITESSE

Tadiavin'i Vazahabe ho tapahana ny sotro fihinanan'ny mpivarotra

Mitokona amin'izao fotoana ireo mpivarotra eny amin'ny Petite Vitesse, satria nesorin'ny kaominina teny amin'ny toeram-pivarotany izy ireo, nefa tsy misy akory ny vahaolana arosan'ny kaominina Antananarivo Renivohitra hoy ireto mpivarotra ireto. Arak'izany, tadiavin'i Vazahabe ben'ny tanàna Naina Andriantsitohaina ho tapahana ny sotro fihinanan'ireo mpivarotra, ka mahatonga azy ireo mitokona sy mitroatra izao. Nahery fiteny mihitsy ireto



Ny hetsik'ireo mpivarotra teny amin'ny Petite Vitesse.

mpivarotra ireto nandritra izany, nambarany fa ataon'ny fiadidiana ny tanàna ho toy ny alika izy ireo, asaina mankary dia

mankany, halefa mankaty dia mandeha, tsy afamanoatra. Izany no nahatonga izao hetsika nataon'izy ireo izao omaly. Fo-

tom-piveloman'ny olona no kitikitihan'i Vazahabe sy ny ekipany, ka anisan'ny mampipoaka sarombilany. Teny Ampasika koa afak'omaly, efa nanao ny hadalany tamin'ny mpitarika saretany ny Polisy Monisipalin'i Vazahabe, nitroatra ireo saretany sy ny mponina, ka tonga hatramin'ny hoe : «Miala Rajoelina». Hiafara amin'izany ihany ny zava-misy eto, satria efa tena mijaly ny vahoaka nefa tsy raharahian'ny fitondrana Rajoelina mihitsy.

Stefa

Filaminam-bahoaka

Nifarana ny fankalazana ny faha-60 taonan'ny Polism-pirenena

Nofaranana omaly sy afak'omaly ny fankalazana ny faha-60 taonan'ny Polism-pirenena Malagasy. Raha fanompoampivavahana iraisam-pinoana no nanombohana ny hetsika faha-60 taonan'ny Polism-pirenena dia toy izay ihany koa no no mentina namaranana ny fanka-

lazana tetsy amin'ny Cathédrale Immaculée Andohalo . Tonga niara-niombom-bavaka teny antoerana ny Minisitry ny Filaminam-bahoaka mivady sy ireo lehibe isan-tsokajiny eo anivon'ny Polism-pirenena ary ireo olo-manan-kaja ambony sivily sy miaramila.

Nitohy omaly ny hetsika, ka namarika izany, nisy ny hazakazaka ara-pirahalaliana nataon'ny Polism-pirenena niainga tetsy amin'ny Gara Soarano nanomboka tamin'ny 06 ora maraina ary nihazo ny Kianja Barea Mahamasina. Ny hariva, nisy ny fiaraha-mifaly teny

amin'ny Espace Rose niarahana tamin'ny tarika Ambondrona. Samy nanana ny nanamarihana an'izay famaranana ny fankalazana ny faha-60 taonan'ny Polism-pirenena Malagasy izay ihany koa ny tany amin'ny faritra.

Isambilo



Fotoam-pivavahana iraisam-pinoana, anisan'ny namaranana ny fankalazana ny faha-60 taonan'ny Polism-pirenena Malagasy.

An-tsary misongadina Ny Valosoa Vaovao

Helisoa

Hetsika filaharambe nokarakarain'ny Trasparency International Initiative Madagasikara, tao anatin'ny fanamarihana ny andro iraisam-pirenena ho amin'ny fahalalahan'ny olom-pirenena hahazo vaovao.



Fitokonan'ireo mpivarotra eny amin'ny Petite Vitesse omaly.



Atrikasa iraisam-pirenena momba ny torohevitra mahakasika ny fambolena, nandraisan'i Madagasikara anjara tany Cameroun tamin'ity herinandro ity.



Ny fanompoam-pivavahana iraisam-pinoana, namaranana ny fankalazana ny faha-60 taonan'ny Polisim-pirenena Malagasy, teny amin'ny Katedraly Katôlika teny Andohalo.



NY TENY FIANANA

Koa atolotro ho an'i Jehovah kosa izy: eny, amin'ny andro rehetra hiainany dia voatolotra ho an'i Jehovah izy.

Dia nivavaka tamin'i Jehovah izy.

I Samoela 1 : 28

ANTSAPAKY NY "CHAN ALGÉRIE 2022"

Ho tanterahina anio sabotsy any Algérie

Ho tanterahina anio sabotsy 01 ôktôbra 2022 any Algérie nanomboka amin'ny 9 ora alina eto Madagasikara, ny antsapaka amin'ny fifaninanana baolina kitra "Chan Algérie 2022". Marihana fa miisa 18 ireo firenena tafakatra amin'ity dingana famaranan'ny Chan 2022 ity : Algérie (pays hôte), Maroc (vainqueur en 2018, 2020), Libye (vainqueur en 2014). Sénégal (4e place en 2009), Mali (finaliste en 2016, 2020), Mauritanie (3e participation) Côte d'Ivoire (3e place en 2016), Niger (4e apparition), Ghana (finaliste en 2009, 2014) Cameroun (4e place en 2020), Congo (4e apparition), RD Congo (vainqueurs en 2009, 2016) Ouganda (6e



Amboara ny Chan.

apparition), Soudan (3e place en 2011, 2018), Éthiopie (3e apparition)

Mozambique (2ème apparition), Angola (deuxième place en 2011),

Madagascar (1ère apparition)

Rainilita

Mpanazatra basket 3x3 Malagasy

Nizaran'i Karim Souchu traikefa

Nizaran'i Karim Souchu, mpanazatra ny ekipa frantsay 3x3, traikefa teny amin'ny foibe toeran'ny FMBB teny amin'ny 67 ha, ny mpanazatra basikety 3x3 Malagasy, tamin'ny alakamisy 29 septambra 2022 lasa teo. Amin'ny sabotsy 8 sy amin'ny alahady 9 ôktôbra 2022 ho avy izao indray ny dingana manaraka amin'ity fizararana traikefa ity, izay natao eny amin'ny Kianja mitafon'Ankorondrano kosa indray. Tompo-marika tamin'ny hetsika mazava loatra ny FMBB Malagasy.

Rainilita



Ireo mpanazatra basikety 3x3 Malagasy teny amin'ny 67 ha.

Makis Ladies XV

Hiatrika ny CAN rugby Féminine 2022



Mpilalaon'ny Makis Ladies XV tetsy Andohatopenaka.

Ao amin'ny Vondrona C no misy ny Makis Ladies XV, hiatrika ny fifaninanana rugby "Can feminine 2022", tafiditra ao anatin'ny fifanintsanana "Eliminatoires Mondial féminin 2023" ny Makis Ladies XV, ka efa ao anatin'ny fanomanana tanteraka izy ireo amin'izao fotoana izao. Hatao any Tunisie ao amin'ny kianja "Stade National de Rugby d'El Menzah" ny lalao amin'ny alarobia 12 ka hatramin'ny alahady 23 ôktôbra 2022 ho avy izao. Ao anatin'ny vondrona C ahitana an'i Tunisie sy Sénégal ary Madagascar no misy ny Makis Ladies XV.

Rainilita

Sakafo Ny Valosoa



Henabaolina sy haricot vert indray, no laoka amin'ny Sakafo eto amin'ny gazetinao androany. Tsara raha hasiana lasary voatabia, na lasary tômaty miaraka aminy. Dia mazotoa homana tompoko.

NY VALOSOA sy Mahaliana

Ny tanànan'Ambatoharanana any amin'ny distrikan'Anosibe An'Ala faritra Alaotra Mangoro

Ny tanànan'Ambatoharanana any amin'ny distrikan'Anosibe An'Ala faritra Alaotra Mangoro indray, no Mahaliana eto amin'ny gazetinao androany. Renivohitry ny kaominina Ambatoharanana ity tanàna ity, iray amin'ireo kaominina miisa 9 mandrafitra ny distrikan'Anosibe An'ala. Saro-dalana toy ny mankany amin'ny renivohitry ny distrika ihany koa ny mankany Ambatoharanana. Vokatra any ny vary, ny voankazo toy ny akondro, ny letchi, ny manga.



Tontolon'ny kitra Malagasy Nodimandry omaly i Maître Tristani Abel Noeli

Misaona indray ny tontolon'ny baolina kitra Malagasy. Nodimandry omaly zoma 30 septambra 2022 maraina i Maître Tristani Abel Noeli, izay "entraîneur psychologique" an'ny Barea Chan fahiny, manana ny mari-pahaizana Licence A CAF. Niantana klioba maro teto an-tanindrazana izy fony fahavelony ary efa nanazatra klioba tany Comores ihany koa, nandritry ny 2 taona ary efa nibata ny tompondakan'i Afrika tamin'ny « Championnat Interclubs CAF ». Izahay eto amin'ny gazety Ny Valosoa Vaovao dia maneho etoana ny fianakaviany akaiky iray manontolo ary amin'ny fianakaviany ny baolina kitra Malagasy amin'ny ankapobeny.



I Maître Tristani Abel Noeli fony fahavelony.

Rainilita

TRANGA MAMPALAHELO

Zazalahy kely 9 taona maty nodarohan-dreniny

Rehefa tonga ny loza, patsa iray tokoa tsy omby vava araka ny fomba fiteny Malagasy iray izay. Toy izany no nitranga tany amin'ny faritra Fitovinany iny. Maty vokatra ny kapoka mafy nataon'ny reniny azy ny ankizy lahy kely, tao Maroalakey Manakara faritra Fitovinany. Araka ny fitantaran'ireo manodidina dia teo ampanaovana ny enti-mody tao antrano ity zaza ity, no nojeren'ny reniny ny zavatra nataony, ka rehefa diso dia tezitra ity farany ka nibedy sy nikapoka azy teo amin'ny lohany. Narary vokatr'ny ilay kapoka nahazo azy ilay zaza ny alarobia hariva



Ilay zaza namoy ny ainy (lanjaina anaty tsihy), noho ny daroka nataon-dreniny.

teo ary afak'omaly alakamisy maraina vao nentina tany amin'ny hopitaly hot-

saboina, saingy tsy tana intsony ny ainy. Vaky nandositra ilay reniny

ary mbola tsy hita izay nalehany hatramin'izao.

Stefa

Fifamoivoizana

Saofera sy resevera mamo am-perinasa, nosamborin'ny zandary

Misy dia manao kitoatoa sy sahisahy mihitsy ireo mpamily sy mpanampy azy eny amin'ireny zotra fitateram-bahoaka ireny. Saofera sy resevera amperinasa mamo, no nosamborin'ny zandarimariam-pirenena teny amin'ny faritra Ambohibao io, miasa mitondra taksibe zotra 112 izy ireo. Tsy ampy 24 ora nitrangan'ilay lozam-pifamoivoizana nataon'ny fiara taksibe zotra D Ivato afak'omaly dia efa tratra sahadry koa ny zotra 112 iray izay miseho azy mafy loha. Olona tsara si-



Ireo saofera sy resevera mamo am-perinasa.

trapo iray tao anatin'ny io taksibe io, no niantso ny

zandary amin'ny toetra tsy mendrika nataon'ny mpa-

mily sy ny mpanampy azy amin'ny fandehanana mafy anatin'ny hama-moana. Tratehaka izy roalahy ary niaiky ny zavatra nataony. Mampitandrina ireo mpitatitra hatrany ny zandary: "ain'olona anie no entinareo mpitatitra, ka tsy tokony hatao kinanga. Tsy miaraka ny familiana fiara sy ny alikaola ary ny zava-mahadomelina. Aok'izay ny herisetra ataonareo mpandraraha ao anatin'ny fitateram-bahoaka amin'ny vahoaka," hoy ny fanambarana.

Niaina

Governemanta Amerikanai

Manampy an'i Madagasikara amin'ny ambana momba ny rano

Manampy an'i Madagasikara hiatrika ireo ambana amin'ny famatsiana sy fampiasana ary fitantanana ny rano ny governemanta amerikana. Ny governemanta Malagasy, ary ao anatin'izany ny minisitera miisa 6 sy ireo rafi-panjakana hafa, dia niaraka tamin'ny Masoivoho Amerikana sy ny vondron'ny injeniera eo anivon'ny tafika amerikana, na USACE ary ny Fibaikoana ny tafika amerikana mitoby aty Afrika, na USAFRICOM, nandray anjara tamin'ny atrikasa naharitra roa andro momba ny rano, ny alarobia sy ny alakamisy teo, hamaritana ireo fomba maharitra azo ampiharina eto Madagasikara hiantohana ny famatsiana sy fampiasana ary fitantanana ny rano.



Ny atrikasa momba ny rano, niarahana tamin'ny Masoivoho Amerikana eto amintsika.

tany, ny tondra-drano, ary ny fiovan'ny toetr'andro, ho an'ny famokarana sy ny fampandrosoana aratokaren'ny firenena. Nilaza ny Ambasadaoro Amerikana Claire Pierangelo tao anatin'ny lahate-niny, fa "ny fahazoana rano fisotro madio dia ao anatin'ny filana fototra ho an'ny olombelona, eo amin'ny sehatry ny fihariana sy ny famokarana ho an'ny firenena." Ity atrikasa ity dia tafiditra

ao anatin'ny asa lavitr'ezaka ataon'ny governemanta Amerikana hanatsarana ny fahazoana rano sy fanadiovana eto Madagasikara. Ankoatra ny ezaka mitohy izay ataon'ny Departemantan'ny Fiarovana Amerikana, sy ny USAFRICOM, ny Sampandrahahana Amerikana misahana ny Fampandrosoana Iraisam-pirenena (USAID) dia niantoka 46 tapitrisa dolara amerikana

nampiasaina tamin'ny sehatry ny rano sy ny fanadiovana nanomboka ny taona 2017, hanatsarana ny fahazoana rano fisotro madio tamin'ny tanàndehibe sy tamin'ny faritra ambanivohitra maro. I Etazonia dia miara-dalana amin'i Madagasikara toy ny mpirahalany mianala ary hanampy hanatsara ny fahasalamana sy ny fiainan'ny vahoaka Malagasy.

Aly

"Tennis ITF/CAT – Circuit Junior U 18 leg 1"

Raraka teo amin'ny 1/4-dalana ny mpilalao Malagasy

Raraka teo amin'ny lalao 1/4-dalan'ny fifaninanana tenisy "ITF/CAT – Circuit Junior U 18 leg 1", tontosaina eny amin'ny kianja COT Ilafy tamin'ny alakamisy 29 septambra 2022 lasa teo, ny mpilalao tenisy lehilahy Malagasy Mahefa sy Mirija, ka tsy tafita niatrika ny lalao ankatoky ny famaranana amin'ity fifaninanana ity. Rakotomalala Mahefa (tête de série n°5) dia lavon'ilay Britanika Castle Maxwell (tête de série n°3) tamin'ny seta 2-0 (4/6, 2 /6). Andriantefihasina Mirija kosa dia resin'ilay Egiptiana Noureldine Moustafa tamin'ny seta 2-0 (4/6, 5/7). Mariha fa rahampitso alahady 02 ôktôbra 2022 no hifarana ity fifaninanana hoan'ny sokajy U18 Leg 1 ity ary ny ampitson'io, hanomboka amin'ny alatsinainy 03 ôktôbra 2022 kosa ny Leg 2, izay tsy hifarana raha tsy amin'ny alahady 9 ôktôbra 2022 ho avy izao.

Rainilita



Mahefa sy Mirija.

Grande Fête Foraine

Hatao andro alina ny famaranana anio sabotsy

Ho tanterahina eny amin'ny kianja « Terrain RFI Para Ivato » anio alin'ny sabotsy 01 ôktôbra 2022 hanomboka amin'ny 5 ora hariva, ny lalao famaranana basikety amin'ny hetsika "Grande fête foraine", niarahan'ny 1er Bataillon sy ny tanoran'Ivato nikarakara. Miaraka amin'ny "animation" samihafa (Kermess - Stand - Animation DJ - show Dance) ary seho an-tsehatra miaraka amin'i Twokii – Arione Joy izany hetsika izany. Marihana fa omaly zoma alina no nanaovana an'ireo lalao basikety ankatoky ny famaranana tamin'ity hetsika ity. Ankatoky ny famaranana vehivavy : ASTAR # CBB, BBCV # ASF. Ankatoky ny famaranana lehilahy : BBB # 1er BAT, BBCV # ASF.

Rainilita



Grande fête foraine eny Ivato.

PRIERE AU SACRÉ CŒUR



Que le Sacré Cœur de Jésus soit loué, adoré et glorifié à travers le monde pour des siècles et des siècles, Amen.

Dites cette prière 6 fois/ jour pendant 9 jours et vos prières seront exaucées même si cela semble impossible. N'oubliez pas de remercier le Sacré Cœur avec promesse de publication quand la faveur sera obtenue.

Remerciements au Sacré Cœur pour faveurs obtenues.

Tsilavo A.

A Mifanaraka **B.** Anilany **D.** Ainga - Ha
E. Mijanona **F.** Anaranao **G.** Toy (miv)
- Iray (miv) **H.** Tia (miv) - Ra - Lio (miv)
I. Variana **J.** Vary (miv) - Andro **K.** Hi-
raja (miv)

An-tsary misongadina Ny Valosoa Vaovao

Helisoa, Navalona

Ny fanompoam-pivavahana iraisam-pinoana namaranana ny fankalazana ny faha-60 taonan'ny Polisim-pirenena Malagasy, teny amin'ny katedraly katolika teny Andohalo.



Hetsika filaharambe nokarakarain'ny Trasperey International Initiative Madagasikara, tao anatin'ny fanamarihana ny andro iraisam-pirenena ho amin'ny fahalalahan'ny olom-pirenena hahazo vaovao.



Ry olompirenena

Feno 18 taona sy ireo mihoatra
Ndao hisoratra
Anarana
ao amin'ny **lisitry ny mpifidy**
manomboka amin'ny volana
Oktobra 2022

Raiso an-tanana ny ho avinao.